


毗婆沙論

才四十一

規

三百六十八


50401



阿毗曇毗婆沙論卷第四十一

迦旃延子造 五百羅漢釋 北涼沙門浮陀跋摩共道泰

使捷度不善品之七



問曰如彼伽羅那說九十八使八十八是見

道斷十是修道斷此中何故說二十八是見

道斷十是修道斷耶答曰此文是了義彼文

是未了義此文無餘意彼文有餘意此

所以彼文有所以此文是實義諦彼文是俗

諦復次波伽羅那說順次法說具縛人非超

越人此中不說順次法不說具縛人不說超

越人復次此中說凡夫聖人離欲聖道所作

世俗道所作彼中說聖人離欲不說凡夫說

規



聖道所作不說世俗道復次彼中說離欲界  
欲乃至離無所有處欲得正決定者先以世  
俗道斷欲界煩惱乃至無所有處彼見道斷  
煩惱解脫得差別作證所以者何彼解脫得  
以見道故而有差別以是事故彼作是說八  
十八是見道斷十是修道斷是故尊者瞿沙  
作如是說二十八使是見道斷十是修道斷  
何故波伽羅那作如是說八十八是見道斷  
十是修道斷彼作是答二十八決定是見道  
斷十是修道斷六十不定不定者於見道中  
而有差別波伽羅那說次身故說八十八是  
見道斷十是修道斷此門是廣分別訛謬沙

問曰何故名見道斷何故名修道斷耶如見  
不離修修不離見見道中如實修亦可得修  
道中如實見亦可得見名爲惠修名不放逸  
如實是何義耶答曰數數義徧重義是如實  
義見道中惠多不放逸也修道中不放逸多  
慧少復次等量義是如實義如見道中慧亦有  
亦許不放逸如修道中不放逸亦有亦許惠  
是故等量義是如實義尊者和須蜜說曰見  
四真諦斷諸煩惱云何分別此是見道斷此  
是修道斷耶答曰以見斷以見制伏以見吐  
諸煩惱故言見道斷復有說者見道所斷煩  
惱亦應言修道所斷所以者何見道中如實

修可得故如我義以見斷以見制伏以見吐  
諸煩惱名見道斷何故名修道斷答曰隨所  
得道修行廣布斷諸生分斷其量斷其種漸  
使薄今究竟斷故名修道斷復有作是說者  
修道所斷煩惱亦可言見道斷所以者何修  
道中亦有如實見故如我義隨所得道修行  
廣布斷諸生分斷其量斷其種漸使薄今究  
竟斷故名修道斷此是何義耶答曰見道是  
猛利道若緣彼時九種煩惱一時斷修道是  
不猛利道數數修習九種煩惱九時而斷譬  
如利鈍之刀以用割物利者一下便斷鈍者  
數數乃斷彼亦如是復次若以見偏多道斷

者名見道斷若以修偏多道斷者名修道斷  
復次若以二相道斷者名見道斷二相者謂  
見相惠相若以三相道斷者名修道斷三相  
者謂見相惠相智相復次若以四相道斷者  
名見道斷四相者謂眼明覺惠若以五相道  
斷者名修道斷五相者謂眼明覺惠智復次  
若以忍斷者是見道斷以智斷者是修道斷  
復次九種結一時斷者是見道斷九種結九  
時斷者是修道斷復次以未知欲知根斷者  
是見道斷以知根斷者是修道斷復次斷時  
如石裂者是見道斷斷時如藕絲者是修道  
斷復次與發意相違者是見道斷與方便相

違者是修道斷復次未曾見諦而見諦斷者  
是見道斷已曾見諦而重觀斷者是修道斷  
復次以一因道斷者是見道斷以二因道斷  
者是修道斷復次如力士著鎗斷者是見道  
斷如無足人行斷者是修道斷復次若斷時  
即彼智所知行修道者是見道斷若斷時是  
餘智餘所知餘行修是諸道斷者是修道斷  
復次若是向人不成就果斷者是見道斷若  
是向成就果斷者是修道斷復次若堅信堅  
法斷者是見道斷若信解脫見到身證斷者  
是修道斷復次若初出道斷者是見道斷若  
數數出道斷者是修道斷復次若斷是四沙



門果攝者是見道斷若斷或三或二或一沙  
門果攝者是修道斷復次若緣無所有生者  
是見道斷若緣有所有生者是修道斷復次  
若斷已不退者是見道斷若斷已或退不退  
者是修道斷復次斷已更不縛不繫是見道  
斷斷已或縛或繫是修道斷復次若斷時忍  
是無礙道智是解脫道者是見道斷若斷時  
智是無礙道智是解脫道者是修道斷復次  
若斷時智作方便道忍作無礙道智所解脫  
道者是見道斷若斷時智作方便無礙解脫  
道者是修道斷復次若先得非數滅者是見  
道斷或先得非數滅後得數滅或先得數滅

後得非數滅或一時得數滅非數滅者是修  
道斷復次若斷時緣一諦道修者是見道斷  
若斷時緣四諦道修者是修道斷復次若斷  
時四行道修者是見道斷若斷時十六行道  
修者是修道斷復次若斷時相似道修者是  
見道斷若斷時相似道不相似道修者是修

道斷復次若斷時若一三昧修者是見道斷  
若斷時若三三昧修者是修道斷復次若斷  
時不起者是見道斷若斷時或起或不起者  
是修道斷

此三結幾見道斷乃至幾修道斷乃至九十  
八使幾見苦斷乃至幾修道斷問曰何故作

此論荅曰前門止說頓斷沙門意不止說一時見諦亦不明次第見諦今欲止一時見諦者意亦明次第見諦故而作此論復有說者前門止說一時見諦者意亦明次第見諦而不履現明了今欲履現明了止一時見諦者意亦明次第見諦故而作此論復次欲顯現五種斷煩惱及五種對治法故五種斷煩惱者謂見苦斷種乃至修道斷種五種對治法者謂苦忍苦智是見苦斷對治乃至道忍道智是見道斷對治智是修道斷對治以如是事故而作此論此三結幾見苦斷乃至廣說荅曰一見苦斷謂身見問曰何故身見惟見苦

斷耶荅曰緣苦生故還見苦斷後於此見緣  
果而生若以惠觀果時此見即斷復次身見  
是顛倒性一切顛倒盡見苦斷若顛倒斷時  
此見即斷所以者何同一對治故復次此煩  
惱麤故以初無礙道斷餘細煩惱後金剛喻  
定斷譬如塵垢不堅著者抖擻便墮若堅著  
者乃以淳灰多用功力然後乃淨亦如瓦器  
膩不深入水蕩便去若膩深入以湯煮之然  
後乃去彼亦如是復次以此見根不深入所  
緣地以不深入故性劣性劣故最初無礙道  
斷餘煩惱根深入所緣地以後無礙道乃至  
金剛喻定斷譬如樹根不深入者小風吹時

而便摧卧其根深入者大風吹時乃能全臥  
彼亦如是尊者和須蜜說曰何故身見誰見  
苦斷荅曰身見緣五陰後如實見五陰時身  
見便斷復次此見從常想樂想淨想我想生  
若見無常想苦想不淨想無我想此見便斷  
尊者佛陀提婆說曰此見從自身生故名身  
見若見自身無我此見便斷戒取或見苦斷  
或見道斷問曰何故戒取非見集見滅斷耶  
荅曰爲外道故外道所行與苦道相違不與  
集滅相違所以者何外道計集如垢計滅如  
洗浴處爲求洗浴處故行種種苦行行諸苦  
行故煩惱垢益更增染心如人爲去垢故入

濁水澡浴更增其垢彼亦如是復次因苦生  
故還見苦斷因道生故還見道斷復次因苦  
生者是見苦斷因淨生者是見道斷復次內  
道所行是見苦斷外道所行是見道斷復次  
非因計因是見苦斷非道計道是見道斷疑  
見苦集滅道斷問曰何故修道斷中無疑耶  
荅曰若未見其體心生猶豫已見其體心則  
決定是故修道所斷無有疑三不善根三漏  
見苦斷乃至修道斷揔而言之五種斷或有  
一種二種四種五種斷者餘門廣說如經本  
此門是廣說優波提舍毗婆沙問曰何故名  
見道斷乃至名修道斷耶荅曰若緣決定對

治決定者名見道斷若緣不決定對治不決定者名修道斷復次若處所決定若緣決定若對治決定者名見道斷若處所不決定緣不決定對治不決定者名修道斷復次若以苦忍苦智作對治乃至道忍道智作對治者名見道斷若以智對治者名修道斷復次若見苦斷者名見苦斷若見道斷者名見道斷若或見苦或見集或見滅或見道斷者名修道斷復次若違苦者名見苦斷乃至若違道者名見道斷若違苦集滅道斷者名修道斷此三結幾是見幾非見乃至九十八使幾是見幾非見問曰何故作此論答曰或有說

一切煩惱皆是見性問曰彼何故作如是說  
耶荅曰彼作是說所行猛利是見性一切煩  
惱各於自分所行猛利如身見者我我所邊  
見著斷常邪見著無所有見取著第一戒取  
著淨所行猛利愛亦是於染著處所行猛  
利恚增惡慢自高癡愚疑猶豫所行亦猛利  
爲斷如是說者意亦明煩惱有是見性有非  
見性故而作此論此三結幾是見性幾非見  
性荅曰二是見性謂身見戒取一非見性謂  
疑餘門廣說如經本問曰何故名見耶荅曰  
此中應廣說如五見見處  
此三結幾有覺有觀幾無覺有觀幾無覺無



觀乃至九十八使幾有覺有觀幾無覺有觀  
幾無覺無觀問曰何故作此論荅曰或有說  
覺觀從欲界乃至有頂如譬喻者說彼何故  
作是說彼依佛經佛經中說心鹿是覺心細  
是觀此鹿細相從欲界乃至有頂中可得尊  
者佛陀提婆說曰阿毗曇者作如是說心次  
第相方而有鹿細徧三界中然從欲界乃至  
梵世有覺有觀如是說者則名惡說汝等作  
如是說鹿心是覺細心是觀此鹿心細心乃  
至有頂可得然說覺觀從欲界乃至梵世中  
有是故汝等所說是惡說非善說惡受持非  
善受持阿毗曇人作如是說我等所說是善

說善受持非惡受持所以者何我以種種事  
故說麁細相非以一事如說纏麁使細是中  
不說覺麁觀細所以者何此二法非覺觀相  
故如說色陰是麁四陰是細如是則說覺之  
與觀俱是細法所以者何同行陰攝故如說  
欲界是麁初禪是細如是亦說覺觀是麁是  
細所以者何欲界初禪俱有覺觀故如說初  
禪地麁二禪地細如是則說覺觀是麁所以  
者何初禪地上更無覺觀故問曰彼說初禪  
地上有覺觀者云何復說三地差別答曰彼  
作是說欲界初禪乃至非想非非想處有三  
種法謂善染污不隱沒無記欲界初禪善法

不隱沒無記法三界染汚法是有覺有觀  
地禪中間善不隱沒無記法是有覺有觀  
地第二禪已上乃至非想非非想處善法不  
隱沒無記法是有覺有觀地問曰若然者  
彼云何通佛經如經說滅於覺觀定生喜樂  
入第二禪彼作是答滅善覺觀非染汚問曰  
若然者爲因何事滅善覺觀非染汚耶法應  
先滅染汚後離地時乃滅於善但譬喻者說  
上地有覺觀當知此說是有明果闇果不勤  
方便果然覺觀欲界初禪中有故欲止他義  
乃至廣說而作此論此三結幾有覺有觀幾  
無覺有觀幾無覺無觀答曰三結有三種或

有覺有觀或無覺有觀或無覺無觀云何有  
覺有觀荅曰在欲界初禪者云何無覺有觀  
荅曰在禪中間者云何無覺無觀荅曰在三  
禪及四無色者餘門廣說如經本問曰何故  
名有覺有觀何故名無覺有觀何故名無覺  
無觀耶荅曰與覺俱觀俱與覺相應觀相應  
與覺觀俱現在前是名有覺有觀若不與覺  
俱但與觀俱不與覺相應與觀相應已滅覺  
與觀俱現在前是名無覺有觀若不與覺觀  
俱亦不與覺觀相應已滅覺觀是名無覺無  
觀復次若種種數若種種觀是名有覺有觀  
若種觀不種數是名無覺有觀若不種數不

種觀是名無覺無觀

此三結幾樂根相應幾苦根相應幾喜根相應幾憂根相應幾捨根相應乃至九十八使亦如是問曰何故作此論答曰或有說法生時次第生不一時生如譬喻者尊者佛陁提婆作如是說法生時次第生不一時生猶如多伴經過狹道次第而行不得一時若欲二人併行此猶爲難何況多人如是一切有爲法各各從生相生何緣衆多生法共一時生阿毗曇者作如是說有爲法自有一法和合而生自有多法和合而生一法和合生者於一剎那頃生故名一法和合生多法和合生

者如一一數法各有一生雖多不相離故名  
多法和合生復次所以作論者或有說展轉  
相因力義是相應義彼作是說若法與彼法  
相因力生者是相應義如心因心力故生心  
與心相應數法因心力故生數法與心相應  
數法因數法力故生數法與數法相應心不  
因數法力生故心不與數法相應爲止如是  
說者意亦明心與數法相應數法亦與數法  
相應數法與心相應心不與心相應故而作  
此論復次所以作論者或有說自體與自體  
相應不與他相應彼作是說等相敬義是相  
應義諸法相敬莫過敬自體者爲止如是說

者意亦明與他法相應義故而作此論復次  
所以作論者或有說自體於自體不名相應  
不名不相應不名相應者一切諸法不能與  
自體作緣不名不相應者等相敬義是相應  
義所以者何諸法相敬莫過敬自體者為止  
如是說者意亦明不亂相應法是故為止他  
義欲顯己義乃至廣說

此三結幾樂根相應幾苦根相應幾喜根相  
應幾憂根相應幾捨根相應問曰何故但問  
與受相應不問與餘數法耶荅曰彼作經者  
意欲介乃至廣說復次受不妨成就妨現前  
行云何不妨成就如一人成就五受云何妨

現前行無有二受一時現前行復次以受一體體有諸根相故復次以受於緣起論中猶如車轂法故復次以受受入一切法故復次若不問受更問何耶若問命等八根彼一向是不相應法若問三無漏根信等五根彼一向是善若作是說何不問意根者以意根故名相應法如以心故名心相應法身見戒取與三根相應除苦根憂根所以除苦根者苦根在五識地此是意地所以不與憂根相應者憂根是憂感行此是欣踊行揔而言之與三根相應此在三界在欲界初禪二禪者與二根相應謂喜根捨根在第三禪與二根相



應謂樂根捨根在第四禪及四無色與一根相應謂捨根是故揔而言之與三根相應除苦根憂根疑與四根相應除苦根不與苦根相應者以苦根在五識地揔而言之與四根相應疑在三界在欲界者與二根相應謂憂根捨根若在初禪二禪者與二根相應謂喜根捨根在第三禪者與二根相應謂樂根捨根在第四禪及四無色與一根相應謂捨根是故揔而言之與四根相應問曰何故欲界疑不與喜根相應初禪二禪則與相應答曰欲界疑喜所行各異故疑所行非喜所行喜所行非疑所行所以者何疑行憂感喜行欣踊

同義是相應義彼不同故不與相應初禪二  
禪俱行欣踊行故相應復次欲界喜麁疑細  
麁法不與細法相應所以者何等義是相應  
義故問曰喜有何麁義耶荅曰衆生不應起  
而起於前物不應起而起云何衆生不應起  
而起衆生性是苦故云何於前物不應起而  
起見他人若顛若墮若謬誤應起慈愍而更  
大笑在初禪二禪者俱微細故相應復次欲  
界喜輕躁疑居重輕躁不與居重相應所以  
者何等義是相應義初禪二禪地二俱居重  
是故相應復次欲界喜從外法生疑從內法  
生從外生法不與從內生法相應所以者何

等義是相應義初禪二禪俱從內生是故相應復次欲界喜是客疑是舊住客不與舊住相應所以者何等義是相應義初禪二禪俱是舊住是故相應復次欲界疑雖不與喜根相應與餘受相應初禪二禪喜是地性受若不與喜根相應者此則名無受心聚壞相依法壞相應法欲令無如是過故欲界疑不與喜根相應初禪二禪疑與喜根相應貪與三根相應除苦根憂根所以者何貪行欣踊憂苦行憂感恚與三根相應除喜根樂根所以者何恚行憂感喜樂行欣踊癡欲漏無明漏與五根相應所以者何此三通六識身所行

欣踊亦行憂感故有漏與三根相應除苦根  
憂根所以者何色無色界無憂苦故色無色  
界無憂苦義根捷度中當廣說除邪見餘門  
義如經本說邪見與四根相應除苦根摠而  
言之邪見與四根相應然邪見在三界在欲  
界者與三根相應除苦根樂根在初禪二禪  
者與二根相應謂喜根捨根在第三禪者與  
二根相應謂樂根捨根在第四禪及無色定  
與一根相應謂捨根問曰欲界邪見何者與  
喜根相應何者與憂根相應荅曰有人本性  
不好布施不好祠祀後苦與邪見外道共會  
一處而聞是語無施無祠祀無善惡業報聞

是語時心生信樂便生喜心我所行善好如是邪見與喜根相應有人性好行施祠祀後若與邪見外道共會一處聞作是說無施無祠祀無善惡業報聞是語時心生信樂便生憂心我等所施便爲唐捐所以者何無果報故如是邪見與憂根相應此門是廣說優波提舍毗婆沙問曰何故名相應相應義如新捷度相應因廣說

此三結幾欲界繫幾色界繫幾無色界繫問曰何故作此論答曰或有說嫉慳在欲界梵世彼何故作如是說答曰彼依佛經佛經說梵天王語諸梵衆我等皆共住此不往詣沙

門瞿曇所而於此處自能至老死彼作是說  
梵王以嫉慳故而作是言為止如是說者意  
亦明嫉慳唯在欲界故而作此論三結或欲  
界繫或色界繫或無色界繫此門義廣說如  
經本問曰何故名欲界繫何故名色界繫無  
色界繫荅曰縛欲界法故名欲界繫縛色無  
色界法故名色無色界繫如牛繫著柱名柱  
繫牛彼亦如是復次欲界足為欲界法所繫  
故名欲界繫色無色界足為色無色界法所  
繫故名色無色界繫是名煩惱如偈說  
佛有無量行 無足誰將去  
如人有足則得自在四方遊行如是有煩惱

足者則能行於諸趣諸生死中復次煩惱於  
欲界作居處想我有想故名欲界繫色無色  
界煩惱於色無色界作居處想我有想故名  
色無色界繫居處是愛我有是見以欲界愛  
潤故見計我我所以色無色界愛潤故見計  
我我所復次能生欲界樂欲故名欲界繫能  
生色無色界樂欲故名色無色界繫樂是愛  
欲是見復次為欲界生死法所繫故名欲界  
繫為色無色界生死法所繫故名色無色界  
繫復次為欲界垢所汚毒所害患所過故名  
欲界繫為色無色界垢所汚毒所害患所過  
故名色無色界繫

阿毗曇毗婆沙論卷第四十一

規

利鈍

下徒困反

藕絲

上五口反

鎧

苦亥愛二反

扑揀

上音斗下音叟

正作膩

尼二反

摧

自雷反

澡滌

二同音早上正

匿狹

二同侯夾

及頃

傾領反

轂

音谷

慼

倉曆反

踊

音勇

謬誤

到下

祠祀

二字音似

唐捐

下音緣

幼反

輕

躁



